


清會典 十六之八

吏部十四之六




漢書
九〇八號

漢書門			
一六	二〇	二八	九〇八
冊	架	函	號類

內閣文庫		
二九	九〇八	漢
函	二〇	書
架	冊	號類

內閣文庫		
番號	漢	908
冊數	160	(9)
函號	295	10



大清會典卷之十六

吏部考功司

致仕

滿漢大臣年老乞休者。

朝廷待以殊禮。或陞秩加銜。或仍給原俸。或令馳

驛還鄉。其尤寵異者。或

御製詩篇褒錫。或

賜袍服文綺。或官其子孫。或遣人存問。或令地方利

弊仍許具疏陳奏。皆出自

特恩。不具載。

凡滿洲蒙古漢軍大小各官致仕。順治十六年。



題准。致仕之官。有世職者。照品給俸。○十八年。議准。無世職之官。年至六十致仕者。仍給半俸。未至六十歲。因疾辭任者。不准給。○康熙五年。諭。年老解任官員。其歷任幾年。及効力情由。俱著明白開列。應否給與半俸。請旨具奏。○二十二年。諭。因疾勒令休致官員。該都統查其病痊之日。照原品隨旗上朝。

凡外官致仕。舊例。任內有未完錢糧盜案。應議革者。仍革職。康熙九年。議准。休致官員。任內未完事件。免其處分。責令接任官承追完結。如有

侵欺那移等弊。仍照例治罪。

告病

官員患病。許解任回籍調治。病痊之日。京職外職。起復各有定例。詳列於後。

凡京官告病。舊例。三品以上官。自行陳奏。四品以下。由該衙門代題。准其回籍。康熙元年。議准。告病官員。具呈該衙門。詳驗患病虛實。取具印文。移咨吏部代題。○又議准。官員身無大病。托故回籍者。革職。若病痊不卽赴部。在地方徘徊留滯。干謁營私者。該督撫題叅議處。若督撫瞻徇不叅。發覺時。卽治以徇庇之罪。○四年。題准。

官員告病回籍奉

旨病痊起用者不限日期。其未奉病痊起用之旨者俱限二年赴部補用。若逾限不來京者令其致仕。○九年議准告病回籍官員不勒年限。俟病痊之日督撫題報赴部補用。凡係自陳官員告病令其自行具奏其餘各官仍由該衙門驗視的實咨部代題。若托故詐病者降一級調用。驗視官罰俸一年。堂官罰俸六箇月。其告病回籍官若在籍生事營私者革職。所屬地方官不報督撫者降二級調用。該地方官已報督撫而督

撫不行題叅者降一級留任。其丁憂告假官在籍生事營私者亦照此例。○二十六年題准在京各部院衙門滿漢官員告病者俟一年限滿方准以病痊補用。如不及年限概不准行。○五十三年議准現在告病之編修檢討并從前告病之修撰編修檢討庶吉士學習進士并科道內有告病者俱照外官告病例休致。病痊不准起用。嗣後爲例。如有祭祖省親遷葬送親者仍照舊例行。○又議准翰林院修撰編修檢討庶吉士學習進士科道等官其先因丁憂終養祭

祖省親遷葬送親具呈回籍後又告病者亦俱照此例休致不准起用。○六十一年十一月。詔京官告病休致在籍者准其起用。○雍正四年題准翰林科道在六十一年恩詔後患病告假者俱准起用。

凡督撫告病舊例總督患病巡撫驗明代題巡撫患病總督驗明代題若係漢軍到京日即報部該部堂官驗視若患病情虛革職永不敘用代題官降二級調用若係漢官令原籍督撫親行驗視具題如患病情虛及徇情不據實陳奏

者事發照此例議處。○順治十六年。

諭督撫有老病者許其自行陳奏。○康熙九年議准督撫告病互相代題若無總督省分許巡撫自行具奏俱免其到部覆驗如詐稱有病後經糾叅首告者令其赴部驗視果虛降二級調用代題官降一級留任。

凡外官告病舊例由督撫查驗代題許其休致病痊之日不准起用順治十八年題准漢軍官員因病解任者病痊之日赴部呈明察實起用其原以年老乞休者不准。○又議准漢軍官員

患病。該督撫親行確驗代題。如駐劄地方遼遠。責令該管司道等官嚴行確驗。申請具題。已經部議覆准者。督撫將本官回京日期報部。俟到京日。該堂官覆驗具題。如患病情虛。本官革職。永不敘用。代題督撫並委驗官各降二級調用。
○康熙元年。

諭。在外漢軍官員病痊起用。仍不淮行。○九年。議准。告病官員。免其赴部覆驗。若托故詐病者。發覺之日。提取到部驗視。如果無疾病。本官革職。代題督撫。罰俸一年。驗視官與出結官。俱降一級調

用。○十二年。

諭。告病回籍官員。果有堪用人才。不拘原任原籍。該督撫據實保奏。○十五年。議准。凡在外告病休致之官。或有告其詐病者。概行免議。○雍正五年。

諭。定例。凡在京各部院官因病告假回籍調理者。病痊之日。仍以原衙門補用。至在外各官。一經告病。卽令休致。所以防不肖有司之托病規避也。但外官有地方之責。果係患病。不能辦理事務。自應呈請離任。病痊之日。雖有才具優長之員。格於成例。不得起用。殊爲可惜。從前有府縣官員告病者。朕

降旨調來引見。見其才尙可用。命醫調治。痊可。卽行補用。誠以人材難得。雖片長薄技。不忍棄置。嗣後外官告病。督撫查明確實具題。令其回籍。調治痊可。有情願起用者。於本籍起文赴部引見。仍以原缺補用。如此。則可以杜規避之端。而人材亦不至淪棄矣。

欽件部件限期

國家懲官員之怠荒厥職。凡事下部議。及行查內外各衙門諸務。俱勒限完結。若逾期不覆者。則治以遲延之罪。所以儆曠官也。

順治十二年。

諭事下部議者。限十日內具奏。需咨會各衙門者。限二十日內具奏。其事關刑名錢穀。不能如限卽結者。先期題明。○十三年。議准。事由本衙門覆奏者。限二十日。由咨會各衙門覆奏者。限一箇月。如有限內難結事情。聽該衙門預行題明展限。○又題准。

直省

欽件限期。地有遠近。事有繁簡。直隸限三箇月。奉天同。山東。山西限三箇月半。河南限四箇月。江南。湖廣。陝西。延綏。通限五箇月。浙江。湖南。寧夏。通限六箇月。南贛限六箇月半。福建。四川。廣西。甘肅。廣東。通限七箇月。各令依期奏結。如事有限內難結者。聽該督撫按詳開事由。於限內題請展限。○十八年。題准。凡行查在外事件。按地方遠近立限。以文到日爲始。直隸。山東。山西。河南。陝西。限四箇月。江南。浙江。湖廣。江西。限五箇月。

福建。廣東。廣西。限六箇月。雲南。貴州。四川。限七箇月。倘有繁重事情。限內不能卽結者。許題明展期。其違限一月者。罰俸三箇月。違限二月者。罰俸六箇月。違限三月者。罰俸九箇月。違限四五月者。罰俸一年。違限半年以上者。降一級調用。一年以上者。降二級調用。二年以上者。革職。違限不及一月者。免議。至各部院題覆一應事件。違限者。俱照此例治罪。其本章咨文送到日期。務於疏內註明。○又議准。甘肅巡撫。照四川例。限七箇月報完。○又議准。直省督撫。凡遇部

院移行

欽件。必逐一查明某部某事。係何月何日咨到。或前任督撫已違限期。方行交代者。令其明白具題。

○康熙元年。議准。直省衙門事件。由督撫行司道府。司道府行州縣者。俱不得過二十日之限。若事不能如限。卽結。亦必預請展期。違者。聽督撫糾參。照例治罪。

○三年。議准。督撫題參遲延官員。必開明違限月日。違者。聽該部院糾參。督撫罰俸六箇月。其違限緣由。仍駁回查明。

○九年。議准。直省巡撫。遇

欽件。部件。以文到日爲始。通限四箇月具題。其總督駐劄本省地方事件。照巡撫限期。通轄隔省地方事件。限六箇月。具題違限者。罪坐督撫。不得分坐道府州縣等官。

○又題准。陝西總督所管甘肅。兩廣總督與廣東巡撫所管瓊州。因相隔遙遠。照隔省例。限六箇月具題。

○十五年。議准。各直省事件。督撫違限半年以上者。降一級留任。違限一年以上者。降二級留任。違限二年以上者。降三級調用。

違限不及半年以下者。處分仍照前例。 如承問官將易結之事遲延不結。或將難結之事不預

行申詳。經督撫題叅。雖期限未滿。及逾限不及一月者。承問官亦罰俸三箇月。如事已完結者。免議。至逾限一月以上者。不分事件已結未結。承問官罰俸一年。督撫計月處分。○二十二年。議准。督撫監臨科場日期。准其按日扣限。隔省出境者。准令題請寬期。若有公務在本省境內者。不得援例題請。○又題准。奉天將軍。府尹。及盛京各部一切移部咨文。兩箇月回文不到。卽咨部請查。寧古塔將軍一切移部咨文。三箇月回文不到。亦令咨部請查。逾此限者議處。○二十

三年議准。凡督撫新任接署事件。俱以到任。署任日期扣算。原限四箇月者。准展限兩箇月。原限六箇月者。准展限三箇月。各遵照完結。○又題准。新任督撫有

欽部事件難結者。准以到任日期爲始。展限兩箇月。停其具疏題請。○又議准。州縣官易結之事。遲延不結。違限三箇月者。降三級調用。四箇月者。革職。○二十四年。議准。凡本章揭帖。不論密題。并平常事件。俱令原題衙門。計程定限發行。揭帖內卽註明日期。於日期上鈐蓋印信。以便稽

察所給火牌。令經過驛遞用印。卽填註所到起發日時。同本章投遞通政使司。至交與驛遞齎送本章。所給傳牌。亦令經過驛遞。填註所到起發日時。投遞通政使司查明。有違限者。將提塘承差。交該部治罪。如有作弊事情。從重究擬。若原題衙門。於本章揭帖批廻內。不寫日期。到京之後。在印信上填註日期者。除提塘承差。交部治罪外。將原題將軍督撫。提鎮等官。題叅議處。○又議准。福建督撫。管理臺灣府事件。因阻隔重洋。以八箇月爲限。○二十五年。覆准。臺灣

欽部事件。限十箇月具題。○三十七年。覆准。嗣後督撫題叅違限者。務將易結不結情由。詳查註明。題叅。照違限月日定例議處。如督撫將易結之事。以爲難結。不行註明。朦混題叅者。經部查出。易結不結情由。將該督撫照徇庇例處分。○四十六年。

諭。部院事務。科道官員。於每月稽查其完結與未完結之處。具題。其各省事務。並無稽查具題之處。以致錢糧盜案人命事務。往往遲延數年數月。至事務完結具題之時。始將逾限處一併題叅。嗣後凡奉旨之事。

大清會典 卷十一
交與何官料理究審。完結與未完結之處。令該督撫等於春夏秋冬四季奏聞。其各部所交之事。完結與未完結之處。亦令各部稽察。於四季奏聞。○五十二年。

恩詔。內外文武官員。除大計軍政處分外。其現在議革議降議罰戴罪住俸等項。各該衙門悉與奏明寬宥。遵

旨議定。違限初參各官。援赦免議。嗣後復以違限題參者。照初參例處分。若未經遇赦初參各官。復經題參者。仍照復參例議處。○五十七年。覆准。嗣

後凡交代承審遲延。與追緝不力等應參事件。該督撫不必另本具題。各照例限咨明各部處分。俱入彙題完結。○又覆准。嗣後部駁再審事件。令該督撫虛心按律改正具題。承審官從前舛錯之處。免其議處。若駁至第三次。該督撫不為酌量情罪改正。仍執原擬具題者。該部院衙門覆核改正。將承審各官。併該督撫交該部議處。○雍正元年。

諭。各省已未完結事件。停其四季造冊奏聞。○又諭。戶部事繁。科抄限三十日。會稿限四十日。○又覆

大清會典 卷十六
三
准。

盛京一切事件。均照京城之例。勒限完結。○又覆准。定例。部院衙門案件。皆有二十日限。嗣後各部院堂司皆立用印檔案。事件一到。卽行定稿。定稿後卽行翻譯說堂。不得彼此推諉觀望。堂號簿用堂印。司號簿用司印。以便稽察。○二年。諭。凡交下速議事件。限五日內完結。○五年。覆准。各省州縣奉到部文查審事件。定例。均以督撫准咨日扣算。四箇月咨題。州縣距省程途遠近不一。若俱一例扣限。參處似未均平。嗣後奉部查

審事件。除臺灣瓊州苗疆地方。仍照定例遵行外。其各省內地。均以州縣奉文之日起。扣限四箇月。咨題完結。其州縣距省水陸里數遠近不一之處。行令各省督撫查明程限。扣定日期。造冊報部存案。於限滿咨參之日。卽將程途里數。咨內聲明。各衙門照冊查對。以杜捏飾遲延之弊。各該督撫與該上司。接准部文。俱限於三日內。卽行檄飭所屬。不得遲緩。如逾三日之限。照遲延事件例參處。至督撫將部文行司。必由司而府轉行州縣。未免遲緩時日。應令各該督撫

行司之後。卽飭該司一面竟行州縣。一面仍行各該道府。轉行所屬。○又

諭。議政大臣。九卿。各部院衙門。八旗。將應奏事件。遲延者甚多。從來寬定限期者。特爲難辦之事。應待行查。有需時日故耳。今看三兩日內。可以完結之易事。亦謂尙未及限。怠慢推諉。置之不卽辦理具奏。及至屆限。始行具奏。與原定限期之意。實屬相違。凡事應隨到隨卽辦理完結。乃將並非難辦之事。稽延時日。此不過從中作弊。以爲請托之地而已。毫無裨益。著議政大臣九卿。將易於辦理事務。

作何另定期限之處。詳悉議奏。遵

旨議定。嗣後除兩衙門會稿八旗會議。仍照定期限完結外。一應不待查核易於辦理事件。如吏禮兵刑工等衙門。向例二十日完結者。今定限十日完結。戶部向例三十日完結者。今定限二十日完結。其八旗及當月旗分所辦易結事件。俱定限十日完結。至議政及九卿會議。向無定限。嗣後如有行查事件。定限三十日完結。不待行查易完之事。限十日完結。定限之後。倘仍有怠緩遲延。互相推諉。以致違限未結者。內閣。科。道。察

出糾叅。照例議處。再兩衙門會稿。雖有定限。但止有主稿衙門逾限處分。以致稿案咨送去後。會稿衙門往往任意遲延。嗣後會稿移送之處。定限十日送回。如逾限不行送回。主稿衙門。卽知會科道等題叅。

大清會典卷之十六

大清會典卷之十七

吏部考功司

離任交代

內外官員。陞轉行取。裁缺。患病。丁憂。必任內無未完事件。方准離任。如交代遲延。朦朧作弊。上司借端阻滯。接任官推諉留難。各分輕重罪之。凡離任督撫。舊例。俟交代方准解任。巡撫病故。將印信交布政司收貯。若遇緊要之事。卽呈該督料理。總督同。康熙十四年。議准。督撫解任。於部文到日。令其離任。總督事務。令巡撫署理。巡撫事務。令總督署理。若無總督省分。及總督兼轄

大清會典 卷十七
省分將巡撫事務交布政使護理。○二十六年。題准。嗣後因公註誤解任等官。照陞員離任例。定限兩箇月。新舊交代。催令回旗。逾限者。照容留廢官例議處。如有錢糧未清。兩月之外。再限六箇月完結。限滿不完。該督撫將承追督催各官題叅。照例議處。卽將本官并伊家口。催令歸旗。將未完錢糧總數備造清冊。咨送該部轉交該旗都統。查變產業賠補。逾此定限不令歸旗。亦照容留廢官例處分。其從前解任等官。以錢糧未清未回者。悉照此例。以部文到日定限。○

雍正三年。

諭。嗣後督撫丁憂。不得遽行送印。其任內文卷。擇司道一人代行。聽候諭旨。方行離任。○五年。

諭。凡屬新舊官員。交代遲延。大約由於舊官案件不清者多。而由於新官勒索者少。若新舊一例處分。未爲允協。著九卿分別定議具奏。遵

旨議定。自後凡督撫核叅交代遲延案件。卽將遲延情由詳細確查。如係舊任官。希圖掩飾。不於兩月內。將任內錢糧等項。徹底清白造冊。交送新任官。則遲延之咎。專在舊任官。與新任官無涉。

大清會典 卷一百一十七
三
該督撫卽將舊任官因何遲延情由明白開註指叅。將舊任官照例議以罰俸一年。新任官免議。如舊任官至例限將屆。始將冊籍造送。新任官又不卽上緊查核。以致遲延。則遲延之咎。固未。在舊任官。而新任官亦難辭責。該督撫將此情由。亦行分別註明指叅。將舊任官照例罰俸一年。新任官罰俸六箇月。如舊任官已將錢糧等項。徹底清白造冊交送。而新任官推諉不接。以致遲延。該督撫卽將因何遲延情由註明指叅。將新任官照例議以罰俸一年。舊任官免議。其

督催不力之上司。仍照定例議處。

凡陞任官員。有前任內未完事件者。舊例。於新任內罰俸一年。順治十八年。議准。陞轉官員。錢糧未清。不准卽赴新任。違者革職。如該督撫朦混徇庇。聽其離任者。各降三級調用。○康熙二年。議准。地方失盜。未經題叅之先陞任者。亦照錢糧未清例。不准卽赴新任。○四年。議准。陞任官員。錢糧未清。限一年完結。盜賊未獲。限二年緝拿。不准離任。其所陞之缺。另行選補。如限全結者。仍照原任論俸陞轉。逾限不結者。降三級

調用。○五年。議准。陞任官員。以吏部文憑到日爲始。兩月內。該撫確查。如有錢糧盜案未清。卽行題叅。如無錢糧盜案。一月內卽令交代。催赴新任。以起行日期申報吏部。若借端觀望。遲延不行。或枉道歸里。詐稱中途患病者。該督撫查明題叅。本官黜革。或上司乘隙借端抑勒遲延者。督撫指叅。降二級調用。或任內果有錢糧盜案未結。而道府廳官不報者。亦降二級調用。督撫降一級留任。○六年。議准。陞任官員。若錢糧盜案未完。每一案。照原任降一級調用。其未完

事件。責令接任官督結。○八年。議准。免其降級。每一案。罰俸一年。○十五年。議准。陞任官員。文憑到日。該督撫卽行委署。限二月內。將任內各項事件。交代明白。准其離任。如本官任內有經管未完事件。不於二月內查明呈報上司。或不卽與署印官交代。或署官新官推諉不受者。俱各罰俸一年。上司督催不力者。罰俸六箇月。如已經申報上司。而上司不卽轉報。或不卽委官署理者。俱各罰俸六箇月。如該管上司已經申報。督撫具題遲延者。亦罰俸六箇月。如無未完

錢糧盜案。上司借端抑勒者。司道府等官。各降二級調用。督撫。各降一級留任。其署官新官。如有抑勒遲留者。亦照此例議處。如陞任後。有續起盜案。及未完錢糧者。署官於兩月內揭報。該撫題叅時。本官每案罰俸一年。如任內有侵欺那移等情弊。署官新官揭報。該撫揭叅時。本官照例議處。至署官新官不查明呈報。或司道府官不行轉報。或督撫不行題叅者。俱照例議處。其陞任官不候文憑。或不與署官新官交代明白。卽行離任者。本官降二級調用。至錢糧盜案

等項事件。未經清結。該管各官聽其離任者。各降一級調用。督撫各罰俸一年。其陞任之官。有各項錢糧冊籍等項未完。詐稱已結。或假捏印結申詳上司。或增改投遞者。革職。如本官將冊籍等件。未交代以前。被衙役燒燬。擲水藏匿等情者。降一級調用。至衙役乘機作弊。侵欺銀兩者。俱照衙役犯贓失察例處分。其鹽課錢糧未完之官。及巡鹽御史。運使。俱照此例處分。○二十七年。議准。廣東瓊州府屬地方遙遠。凡陞任。並解任。歸旗人員。交代。於定限外展限一箇月。

○二十八年。覆准。嗣後凡外官陞授京職。原任內實有不得已事故。令該督撫查明具題免議。倘有中途患病阻滯之處。本官將情由具呈該地方官員。驗看是實。出具印結。卽報該督撫詳查題明。如有借端觀望遲延。及繞道歸里。捏稱中途患病者。將本官革職。出結官降一級調用。轉詳代題各官。俱罰俸一年。○雍正元年。

諭。凡一應衙門卷案。各有職掌之官。稽查引據。全以檔案爲憑。此固一代之典冊。六官之掌故。不得視爲具文也。收貯卷案。封禁雖嚴。而翻閱查對。不能

逃書吏之手。盜取文移。改易字跡。百弊叢生。莫可究詰。皆由司官漫不經心。或且通同作弊。遂至於此。嗣後司官遷轉。將所掌卷案新舊交盤。各具甘結說堂存案。如有疎失換易等弊。一經發覺。與受同罪。爾各部院衙門。急宜查核清楚。設法封貯。永杜弊端。不得因卷案浩繁。畏難生阻。其交盤事例。爾部院諸臣。公同確議具奏。遵

旨議定。從前所有卷案。歷年已久。不無損壞沓爛。臣等嚴飭各司官等。備細詳查。各立號簿。登明號件。呈堂用印。加謹收貯外。其自雍正元年起。將

大清會典 卷十七
六
所辦卷案。專責滿漢司官。躬親檢點。記明號件。小心收貯。遇有查閱之處。滿漢司官。親身驗看。毋得專假書吏之手。若遇遷轉之日。將所有經管卷案。逐件交代。出具並無遺失甘結。說堂存案。倘有不肖司官。與書吏通同作弊。盜取改易之處。立即指名題叅。并將書吏從重治罪。○五年。

諭。內外各官。皆有職業。不可一日曠缺。屬在大員。尤為緊要。外任督撫在任丁憂者。已令聽候諭旨到。方行離任。嗣後三品以上京官。陞轉之日。其原任內。若無同堂辦事之人。仍令本人辦理。俟吏部具本開缺奉旨補用人員之後。方行卸事。其兼管別衙門者。亦一體遵行。

凡降級裁缺解任。患病丁憂。官員有前任內未完事件者。舊例。每一案罰俸一年。多至四案者。降一級調用。康熙八年。議准。前任內有未完事件。每一案罰俸一年。○十五年。議准。交代明白。方准離任。若不候交代。及該管上司任其離任者。俱照陞員例處分。○又議准。老病官員。有未完事件者。既經休致免議。如有侵欺那用等弊。

仍照例治罪。

凡行取官員交代。舊例。與陞任官員同。康熙十五年。議准。部咨到日。限兩月內。該督撫卽委官交代清楚離任。如有未完錢糧盜案。該督撫於限內題叅。不准考選。其餘各項事件。不交代明白。卽行離任者。降二級調用。至到部限期。照地方遠近定限。違限三月以上者。不准考選。違限五月以上者。照赴任違限例處分。○十九年。覆准。行取官員。離任遲延者。該督撫司道各官。俱照陞員離任。督催不力例治罪。

開復抵銷

追補罰俸附。

國家紀功紀過。賞罰維昭。大小官員。因公註誤。則降黜奪俸以罪之。其或事前著有勞績。或事後報最邀

恩者。俱得復其原官。食祿如故焉。

凡降級開復。舊例。內外官員降級留任。三年滿日。如自陳大臣。及督撫。令其自行奏請復級。如不係自陳官員。由該堂官詳核。移送吏部。題請復級。布按以下官員。由該督撫詳核具題。吏部覆核復級。○順治十八年。

諭。內外各官降級留任者。三年無過。俱准題請復級。如三年之內。復行降級者。卽以後降之日爲始。三年之內。有過。罰俸者。仍照月日扣除。至拖欠錢糧。能速催完解。緝拿盜賊。能依限捕獲者。不拘月日。俱卽准題請開復。○康熙九年。議准。官員錢糧未完。或因公註誤。降級者。後經開復。將任內所有加級。紀薦。俱准給還。○又議准。內外官不將降級罰俸情由查明。遽題請開復者。題請官罰俸六箇月。轉詳之。司道府等官。罰俸一年。如督撫將伊等續有之降級罰俸情由不行題明。遽請開復者。罰俸

一年。至本官已經申呈開復。該管上司。抑勒不詳者。罰俸一年。督撫不具題者。罰俸六箇月。如屬官隱瞞本身罪過。呈請開復者。亦罰俸一年。
○三十八年。

諭。嗣後官員有因公註誤降級者。三年滿日開復時。停其具題。該部繕摺啓奏。

凡革職開復。康熙九年。議准。官員已經黜革。又有前任事故。到部議處。必分註應降應革。題明存案。倘事後辨復還職。仍將前任事故。逐一查核。如再有應革之罪。不得卽議還職。如有應降

大清會典 卷一百一十五
九
之罪。卽照原職降級。如有應罰之罪。仍於補任日罰俸。如官員因錢糧未完。因公誑誤革職者。後經開復。將原任內所有加級。紀薦。俱准給還。○十四年。議准。官員被叅革職。提問者。後經審虛。仍准還職。如失察衙役詐贓。並無入已。援赦免議者。亦准復原職。○四十九年。覆准。凡督撫將離任官員。題請留任者。員缺雖擬有人。而未經奉

旨者。將原官准其留任。如新補之員。已經奉

旨者。令其赴任。原官赴部另補。○又覆准。嗣後州縣官員。虧空。被叅解任。補完之日。例應開復者。仍以原缺補用。○雍正二年。

諭。凡官員虧空錢糧倉穀。該管上司失於盤查。自應革職分賠。但定例虧空官員。審無侵欺入已之項。勒限一年內賠補全完。准以原職補用。而失察革職之上司。反不得與本官一體開復。似屬可憫。嗣後虧空銀穀限內全完。例應開復者。該督撫查明原叅失察之上司。一并題請開復。

凡革職留任開復。雍正四年。

諭。向來革職留任官員。從無開復之例。年久奉職無

愆者亦應開復以示鼓勵。嗣後革職留任之員。如四年無過者。著該督撫題明。准其開復。著爲定例。凡降罰抵銷。舊例。紀錄官員。後遇叅處。除貪贓壞法。大計京察。失陷城池。八法處分。衙役詐贓不能覺察等事。及罪至革職者。俱不准抵銷。至革職住俸戴罪。以及降俸降職戴罪官員。原係虛革虛降。亦不准抵銷。其餘錢糧叅罰。以及別項註誤事故處分。每紀錄一次。抵罰俸一年。如罰俸不止一年者。仍留紀錄。竟行議罰。每紀錄二次。抵降職一級。如應降職二級。而止有三次

紀錄者。應以紀錄二次。准抵銷降一級。仍降一級。帶紀錄一次。若紀錄浮於降罰之數者。除抵銷降罰外。餘仍留註冊。○順治十四年。議准。薦舉官員。亦照紀錄官員例。抵銷降罰。至有加級之官。後遇降級。准其按級抵銷。○康熙元年。覆准。紀錄四次。或薦二次。抵降職一級。紀錄二次。或薦一次。抵罰俸一年。紀錄一次。抵罰俸半年。○又議准。老病休致之官。其原任有加級。紀錄。薦者。仍留註冊。後遇事故。准其抵銷。○二年。議准。官員有不論俸滿卽陞者。准抵銷降一級。○四

年題准軍功紀錄一次准抵銷降一級。○又議准事關錢糧處分者雖有紀薦不准抵銷。○又議准降級留任各官後遇加級紀薦准其抵銷。○九年議准卓異一次者准抵銷降一級事關錢糧處分有軍功紀錄者方准抵銷京察大計處分官員所有紀薦不准抵銷亦不准隨帶。○十五年議准京察大計處分官員先經舉薦卓異者不准抵銷隨帶若因別項加級紀錄者不准抵銷仍准隨帶至拖欠錢糧官員先因錢糧全完加級紀錄者亦准抵銷。○又議准官員將

先經抵銷之薦紀重開抵銷者罰俸一箇月。○十八年覆准督撫司道等官濫將匪人徇情保舉薦舉卓異保留者照例議處俱降實級不准抵銷。

凡補任罰俸康熙四年題准官員如前任內有發覺事件應罰俸者陞轉官於新任罰俸降調官照所降之級罰俸裁缺給假丁憂官於補官日罰俸。○九年議准離任官員虛降虛革及初選官員有應罰俸者俱照此例。

凡革職留任官員舊例應罰俸事件無俸可罰

者俱免罰俸。○康熙二十三年議准。應罰俸者。仍行罰俸。交地方官追取。

凡兼攝官員罰俸。雍正元年。

詔。王等以下。世職以上。如伊等兼攝任內。有罰俸之罪。照伊等兼攝任內職銜罰俸。其餘剩俸銀。仍著給與。

揭報題叅

外吏貪污不職。責令上官申報題叅。其有容隱失察者。治以徇庇之罪。如屈廉爲貪。悞行揭叅者。則罪及上官。以儆恣肆云。

凡揭叅劣員。舊例。官員貪黷。經督撫訪確題叅。而司府各官。始行補揭開報者。各降三級調用。康熙八年。議准。揭報不實。屈廉爲貪者。揭報之司。道府降一級調用。該督撫降一級留任。巡鹽御史題叅所屬不實。其處分與督撫同。揭報官與司道府官同。○九年。議准。總督巡撫貪婪。令

互相糾叅。如徇私隱蔽。不分同城。不同城。俱降三級調用。布按兩司。免議。其方面以下大小官員。有貪婪者。上司不行揭報。被督撫訪察題叅。將同城之司道府官。各降三級調用。不同城者。降一級留任。如司道府官。雖不同城。已有聞見。不行揭報者。仍照同城例議罪。其直隸知州。與知府同。若署知府。直隸知州。印。不揭報者。罰俸一年。或司道將貪劣官員。申詳督撫。而知府不行揭報者。或知府申詳司道。而司道不行揭報者。或知府已報督撫。竟不申詳司道者。俱照前

例處分。至科道指叅外官貪劣。欸蹟。審問果實。而布按道府。先未揭報者。亦照前例處分。督撫先未題叅者。照司道例。分別處分。其督撫既叅貪劣官員。不開未經揭報之司道府等官職名。指叅者。罰俸一年。如將清廉官員。屈爲貪劣。審問涉虛者。原揭之司道府等官。降二級調用。督撫降一級調用。或官員互相訐告。該管官不行申報。及督撫發覺行查。又行遲悞者。或司道府等官。未奉督撫發行。將屬官。竟自拿禁者。或督撫行查貪劣官員。遲延不行速報者。或督撫密

行訪察。漏洩消息。以致有自盡脫逃者。俱罰俸一年。其自盡官員。如有威逼致死情由。經部行查。取其妻子口供。審問情實証確者。將威逼之官。革職提問。至於管鹽官員貪劣。或被督撫科道糾叅審實者。將不叅之巡鹽御史。並不報之運使等官。俱照督撫司道例。分別處分。如巡鹽御史。將所屬管鹽官員列欸題叅。與督撫司道無涉。免議。若巡鹽御史等官。將清廉官員屈爲貪劣題叅審虛者。照督撫司道例處分。○二十三年。議准。司道府官。未奉督撫發行。拿禁無罪屬官。併罪不至拿禁之屬官。俱革職。

凡誤揭屬官處分。舊例。該管上司將所屬官員經管事件。併月日。不行查明。舛錯揭叅。以致本官革職者。申報之上司。降二級調用。督撫降一級留任。致本官降級者。申報之上司。降一級調用。督撫罰俸一年。康熙十四年。議准。揭叅有誤。致本官革職者。申報之上司。降一級調用。督撫降一級留任。致本官降級者。申報之上司。降一級留任。督撫罰俸九箇月。致本官罰俸者。申報之上司。罰俸六箇月。督撫罰俸三箇月。如將不

應叅之官揭報題叅。未經處分。經部查出者。若係革職降級事件。誤報之上司。罰俸一年。督撫罰俸六箇月。若係虛革虛降及住俸罰俸事件。誤報之上司。罰俸六箇月。督撫罰俸三箇月。

糾劾條奏

國家建置臺垣。職司糾劾條陳。以弘言路。其或糾叅失實。及越位妄奏者。又各分別罪之。所以慎核言責也。

凡叅奏不實處分。舊例言官奏事。必有詳確款項。方可據實糾叅。若無親見確實。具題者。降二級調用。○康熙九年。題准言官列款糾叅貪婪官員。有一二事審實者。免議。若審問全虛。及條陳事件疏內。隱含議刺。奉

旨議處者。或不據實回奏。奉

旨議處者。或叅官員老病衰庸涉虛者。俱降二級調用。○十五年。議准。條陳譏刺。及回奏不實。奉旨議處者。或凡事不據實陳奏。或並無可據。稱風聞具題者。俱降一級調用。凡妄行瀆奏處分。康熙四年。題准。內外無言責官員。借公行私。將私事具奏者。或妄行條陳事件者。俱不准行。仍各降二級調用。○十四年。議准。言官借端條陳。陷異護黨。挾詐報復。并陰受囑托。及行賄作弊。具奏者。發覺之日。本官革職。交刑部治罪。若不係言官。有犯此者。處分同。

凡密奏本章。順治十八年。題准。督撫言官題奏。應密不密者。罰俸六箇月。○康熙九年。議准。不應密而密者。處分同。○十四年。議准。內外無言責官員。本無密事。妄行密奏者。降二級調用。凡條奏議敘。雍正五年。

諭。朕日理萬幾。惟欲周知庶務。通達下情。是以廣開言路。令人條奏事件。異於政事有所裨益。近見條陳人員內。頗有能據實陳奏。不避嫌怨。切中情弊者。朕思此等之人。其言既可採錄。則其善亦不可泯。嗣後凡內外大小引見人員。有所條陳。曾經發

交廷議允行者。著吏部將姓名事件。記明檔冊。其
人日後。或被堂官叅劾。或被督撫糾叅。該部議處
覆本之時。著將該員某年條奏某事。曾經允行之
處。寫籤夾於本內進呈。以便斟酌其事之輕重。量
與寬減。則國家政治。既得條奏之益。而其人亦身
受敢言之效。庶可共加勗勵。

呈辨冤抑

八法處分官員告
辨。詳見考察通例。

凡官員果有冤抑者。舊例。許於吏部呈辨。康熙
八年。覆准。年久已結之案。有在吏部呈辨者。概
不准行。如果有冤抑。許赴通政司鼓廳控告。至
降級革職之官。或在通政司鼓廳告辨。具題者。
吏部查明冤抑果實。准其開復。其同案內處分
之人。一併昭雪。○九年。議准。初次叩

閤審虛者。罰俸九箇月。復稱冤枉叩

閤者。降二級調用。初次具告通政司鼓廳審虛者。罰

俸六箇月。復稱冤枉具告通政司鼓廳者。降一

級調用。若於原詞之外。捏造言語。妄生枝節。具
呈通政司鼓廳者。照定例處分外。再降一級調
用。若已經革職之官。俱交刑部治罪。若告辨官
員。具呈原議衙門。不行申理。赴通政司鼓廳控
告。准收呈狀。核明具題。冤抑果實者。原議不行
申理衙門官員。罰俸六箇月。如實無冤枉。已經
控告不准。又復向原議衙門申辨者。係官。罰俸
六箇月。係平人。交刑部治罪。

凡控告上司。康熙九年。議准。官員捏告上司受
賄私派等事。審虛者。革職審問。○十九年。議准。
官員被上司揭報糾叅之後。始首告上司索詐
苛求者。照京察大計降革官員控告例處分。

大清會典卷之十七

大清會典卷之十八

吏部考功司

處分雜例

文職處分。職在功司。各衙門因事分類。其處分則例。即附載本條。以便稽考。遇有叅劾官員。仍送功司議覆。至有事異例殊。諸司所不能悉載者。彙附於此。

凡官員違誤。康熙九年。議准。慶賀表文。朝覲計冊。舛錯。及遺漏不奏。或遺漏字樣。并借端推諉。或遲延。及不差的當人。途中耽誤遺失者。俱罰俸一年。如用印歪斜模糊顛倒。及未

大清會典 卷十八
用印信。繕寫潦草。不列職名。并破裂染污者。俱罰俸六個月。督撫亦照此例處分。
凡本章錯誤。康熙六年。議准。疏內錯寫官銜。或從旁添註字樣。或舛錯遺落者。啟奏官。及不加詳對之主事。各罰俸一個月。有品級筆帖式錯寫者。罰俸兩個月。無品級筆帖式錯寫者。交刑部議罪。校對字跡。與尚書侍郎無涉。免議。
凡貼黃本章互異。康熙十年。題准。督撫疏內所有事件。貼黃內遺漏者。或貼黃內所有事件。疏內遺漏者。罰俸三個月。

凡墨污本章。康熙六年。題准。官員本章被墨污者。罰俸一個月。

凡錯寫票籤。康熙九年。議准。官員批寫票籤。如將工部知道。錯寫兵部知道者。大學士。罰俸一個月。學士。罰俸兩個月。

凡刷卷舛錯。康熙九年。議准。官員將送刷文卷數目舛錯者。罰俸一個月。○十四年。議准。堂官罰俸一個月。司官。罰俸三個月。

凡錯悞儀注。康熙三年。題准。官員不照部定儀注行文。彼此文移舛錯者。罰俸六個月。

凡遺失科抄。康熙六年。題准。罰俸兩個月。
凡遺失紅本。康熙十七年。議准。遺失紅本者。降
一級留任。

凡漏洩機密。康熙十七年。議准。紅本已奉
旨到科。未經到部。卽行抄傳報知者。該科官。罰俸六
個月。傳報之人。交刑部治罪。○雍正三年。

諭。各省督撫提鎮。將朕摺批密諭。有同在一省而彼
此互相傳看者。有隔越隣省而彼此互相通知者。
亦有經過其地而私相探問者。周易曰。機事不密。
則害成。是以歷來會議軍務。皆極慎密。以防漏洩。

凡文武大吏之密奏。及朕所降密旨。俱係國家緊
要事件。豈不更重於軍務。而可輕洩以貽害乎。嗣
後若有此等。一經發覺。該部槩照漏洩軍機例治
罪。○五年。

諭。向來督撫提鎮陳奏本章。例有副本投遞通政司
衙門。又有揭帖知會關涉之各部院。往往緊要之
事。未達朕前。而先已傳播於衆口。又如內外咨呈
文書往來。該衙門尤易疎忽。以致匪類探聽。多生
弊端。間有緝拿之犯。聞風遠颺。遂至漏網。此皆不
慎之故。貽誤匪輕。嗣後一切本章。以及咨呈文書。

大清會典 卷十八
除平常通行事件外。其有關涉緊要之案。與緝拿人犯之處。內外各衙門應密封投遞。各該堂官應謹慎辦理。以防露洩。倘有疎忽。將來事發之日。究問根由。必將露洩之人。及該管官員。從重治罪。其稽查之處。交與科道官員。倘有疎忽露洩之事。科道不行查出。亦一併加以處分。其如何詳悉定例之處。著大學士九卿會議具奏。遵

旨議定。嗣後除平常通行事件。照舊承辦外。凡關涉緊要之事。督撫提鎮陳奏本章。將副本揭帖封固投遞。封面用密封字樣。通政司收到密封副

本。堂官親自開拆。另存檔案。仍封固收貯。各部院收到密封揭帖。務須該堂官親拆。面交該司官。該司官接受。密行收貯。謹慎辦理。其督撫提鎮移咨各部院。有緊要事件。及緝拿人犯之案。亦密封投遞。各部院堂官親拆。面交該司官承辦。在京各部院。有此等緊要事件。文移咨呈。亦必密封投遞。其咨照各省督撫提鎮文書。亦必密封遞發。該督撫提鎮親拆收貯。其各省自督撫提鎮。以至州縣來往公文。亦將緊要事件。密封投遞。本官親拆收貯。不得令吏胥經手。倘有

未經上達先已傳播。及緝拿之犯聞風遠颺等事。查究根由。分別議處。如將應密之事。並不密封。以致露洩者。將封發官查叅。如收受承辦衙門。收到密封事件。不行謹慎。以致露洩者。將收受承辦官查叅。事理重者。照紅本不謹慎收存例。降一級留任。事理輕者。照不應輕律。罰俸九個月。如收貯之處。及投遞之前。提塘。及衙役人等。將密封事件。私開竊視。以致露洩者。查出。照私開官文書印封看視律。杖六十。事重者以漏洩論。爲首。杖一百。徒三年。從。減等。律治罪。此等

事件。交與科道官員稽查。如不行查出。糾叅。別經發覺者。將該管科道官員。一併交與該部。照奉

旨事情未到部之先。卽行抄傳報知例。罰俸六個月。
○又議准。如有報房與各該衙門書辦。彼此勾通。本章一到。卽便抄寫刊刻圖利者。將買抄之報房。賣抄之書吏。亦俱照洩露密封事件例。杖六十。干重事者。爲首。杖一百。徒三年。從。減等。治罪。其捏造訛言刊刻者。照洩露密封重事例。加一等。杖一百。流二千里。若有招搖詐騙情弊。應

照指稱各衙門打點使用名色。誑騙財物。計贓犯該徒罪以上。不分首從。俱發邊衛充軍律。應發邊衛充軍。該管官失於覺察。該管科道不行查出糾叅。俱照洩露密封事件例。分別議處。至於衙門書吏。如有舞文作弊者。應照平人加一等治罪。其紅本科抄。遍傳天下。應令承辦官詳悉校對。敬謹奉行。如有增減錯漏。係何衙門所奉

諭旨。將承辦校對之員。照錯誤本章例議處。

凡遺漏行咨。康熙九年。題准。官員將革職緣由

遺忘。未咨該部者。罰俸兩個月。○六十年。議准。

官員有降罰承追等案。一經奉

旨。考功司卽行文知照文選司。於補官日。將叅罰帶

於新任。如有遺漏不行知照者。將司官交都察

院議處。書吏送刑部治罪。

凡本章失印。康熙九年。議准。官員於本章年月

上。未用印信者。罰俸一個月。

凡印信模糊。康熙九年。題准。印信年久字畫不

清。理應詳請更換。如不行申請。以致本章咨文

用印模糊。由部查出者。本官罰俸六個月。如本

官已請更換。而督撫不行咨題者。與本官無涉。免議。督撫照此例處分。如印信損壞。或舊印不繳送者。處分同。

凡誤用印信。康熙九年。議准。官員應用堂印事件。誤用司印。應用司印事件。誤用堂印。及署事官與兼轄官錯用印信者。俱罰俸三個月。○雍正三年。議准。本身私事。俱用奏本。不准用印。

凡預給用印白結。康熙十五年。議准。罰俸一年。○雍正元年。覆准。堂官降一級罰俸一年。司官降三級調用。

凡私用印信。雍正元年。覆准。各部院衙門堂印。甚屬緊要。凡有行移事件。務須該各司官。回明各該堂官。方許用印。數目登記號簿。倘有不行回明本堂。用印行文者。事雖無涉於私。將司官嚴加治罪。

凡書辦偷用印信。司官失於覺察者。雍正元年。諭。革職。不准援赦。

凡私書擅用官印。雍正四年。

諭。各省文武大小官員。嗣後有以官印用於私書手本者。從重治罪。

凡撫綏無術。康熙七年。議准。督撫係封疆大吏。如毫無治理裨益地方。致百姓困苦流離。荒棄田地。徭賦難輸者。革職。從重治罪。○十四年。議准。該管司道府官。亦革職。○雍正元年。議准。大臣爲小臣之表率。若屬官虧空錢糧者多。卽係上司不能以清慎爲率。盜賊繁多。諸務廢弛。卽係上司不能以勤慎爲率。如各省屬員內。有虧空多。盜案繁。廢弛甚者。許科道官年底查實題叅。將該督撫照才力不及例。降二級調用。加級紀錄。不准抵銷。

凡文武官員失損劄付旗牌等項俱照
誥勅例處分。

凡奉

旨會推選用。康熙十八年。議准。若所選之人貪污者。原舉出之官。從重治罪。

凡進士領文赴考中書。乃不赴部。私回原籍。不呈詳該地方官者。康熙十四年。題准。俟補官日。罰俸一年。

凡虛懸城守。康熙六年。題准。官員因公出境。將城守倉獄事務。交與不應管理之人而去者。罰

俸一年。如上司將城守之官。盡行傳去。以致城空者。亦罰俸一年。

凡提審開缺。康熙六年。題准。督撫糾叅貪酷官員。或應革職提問者。或應解任聽勘者。或提解來京者。俱開缺。另行銓補。○九年。議准。官員除應革職提問。應解任審問。及奉

旨提解來京者。開缺另補外。其止在本省質審訊問。及來京質審訊問者。不開缺。若此省官員。發隔省質審訊問者。仍開缺另補。○十六年。題准。官員緣事。或差堂官。或差司官。前往審訊。有議革

職降級者。本月二十日以前到部。卽開缺補授。二十日以後到部。缺歸下月。

凡摘印委署遲延。雍正五年。覆准。嗣後部議降調革職官員。奉

旨部文到日。該管上司。卽委員摘印署理。令其離任。若不卽行遣官摘印委署者。將該管上司。照徇庇例。降三級調用。○又

諭。凡外任各官。嗣後遇有錢糧刑名事件。應行降調革職之員。該督撫題叅之日。卽行摘印委員署理。俟該部議覆奉旨定案之日。再行開缺。若有旨寬

大清會典 卷十八
免。仍准復還原任。永著爲例。

凡失報事故。康熙九年。議准。州縣官將候補及初授官病故情節。不行轉報。或由部提審對質之官。不行報明。經部選給憑後。始行補報者。或未報上司。詐稱已報上司者。州縣官罰俸一年。其申報情由舛錯者。罰俸六個月。與上司無涉。免議。如州縣官已報上司。而上司不行申報者。則止罪及上司。罰俸一年。如上司將已報情由。不行承認。推諉屬吏者。亦罰俸一年。○十五年。議准。候補初授官病故。若家屬並未具報者。與

州縣官無涉。免議。其未經具報接任官。係不知情。亦應免議。

凡失報逃官。康熙九年。議准。官員於所屬現任官內。有潛逃不行申報者。罰俸一年。或有員缺不報者。處分同。○十五年。議准。投誠官員棄劄脫逃。地方官不行申報。或申報遲延者。州縣官。罰俸六個月。知府通判等官。罰俸三個月。

凡裁缺戀職。康熙九年。議准。裁缺官員。別無事故。留戀日久者。革職。該管官不行查逐。降一級留任。督撫罰俸一年。○十五年。議准。裁缺戀職

者。本官降一級調用。該管官罰俸一年。督撫罰俸六個月。○三十九年。覆准。督撫提督。凡有關係錢糧命盜地方重大事件。并

欽部等緊要事件。揭報遲延。俱照定例議處。至於裁缺戀職。未經查逐。開復丁憂。不行轉報。無關緊要之事。及定例內未經開載。應行比照此例議處。罰俸一個月至六個月者。俱停其議處。

凡旗員才力不及題叅降級之員。照伊所降之級隨旗行走。

凡失繳偽劄。康熙九年。議准。地方官將投誠劄付印信繳送遲延。或並未繳送。詐稱已繳者。俱罰俸一年。

凡四川紳宦回籍。康熙二十五年。題准。四川舉貢。監生。會試赴選。本省巡撫咨送。其在別省入學生員。收入川省學冊一例考試。將起程日期。并到省月日。報部。若限內不行。催回原籍者。該督撫將不回籍紳衿。并容留之該地方官。指名題叅。照例議處。其現任官後離任者。亦應照例令回原籍。○雍正三年。覆准。停止。

凡

大清會典 卷十八
盛京紳宦回籍。康熙二十五年。覆准。入籍奉天中式者。卽令於奉天居住。如寄居別省。該府尹察出。卽行咨革。奉天籍中式出仕者。後經解任。不回原籍。該府尹查明題叅。送刑部從重治罪。仍令押回奉天。如各省地方留住。不行察出。事發。將該地方官及該督撫。一并照例處分。

凡貴州紳宦回籍。康熙五十五年。覆准。貴州出仕緣事革職解任。休致。丁憂。官員。不得留住外省。照奉天四川紳宦回籍之例。勒令回籍。其現留外省者。亦照例遵行。如本人遷延不歸。及地方官徇情容留者。均照例處分。

凡留住廢官。舊例。革職解任官員。漢人。速令回籍。旗下。速令歸旗。仍將起程之日報部。經過州縣。沿途交付印結。送至京城。該旗亦將到京緣由。具咨送部。如無故不卽回京。或在原任地方。或在他處居住。或起程之後。中途逗留者。送刑部從重議處。其府州縣官員。留住一人者。降一級調用。二人以上。按數遞降。多至六人者。革職。該管道官。留住一人。至五人者。降一級調用。六人。至十人者。降二級調用。十一人以上者。革職。

該督撫留住一人。至五人者。罰俸一年。六人。至十人者。降一級。留住。十一人。至十五人者。降二級。留住。十六人以上者。降三級。調用。○康熙九年。議准。該管道官。留住廢官一人。至四人者。罰俸一年。廢官在途遲延逗留。該地方官不速催回旗回籍者。照違限例處分。○十五年。議准。府州縣官。留住廢官一人者。罰俸六箇月。二人者。罰俸九箇月。三人者。罰俸一年。四人者。降一級。留住。五人者。降二級。調用。六人以上者。降三級。調用。該管道官。留住一二人者。罰俸三箇月。三

四人者。罰俸六箇月。五、六人者。罰俸九箇月。七人以上者。罰俸一年。十人以上者。降一級。留住。該督撫。留住一、二人者。免議。三人以上者。罰俸三箇月。六人以上者。罰俸六箇月。十人以上者。罰俸九箇月。十五人以上者。罰俸一年。○十七年。議准。凡在外漢軍。降級革職。緣事解任。裁缺候補。文武官員。公務已完。妄借事故。不速回旗。或仍居原任地方。或寄居他處。或中途逗留。或本身進京。而家口仍留在外者。俱革職。送刑部議處。若已經革職者。送刑部從重治罪。其該管

州縣官。不嚴查速催。借端遲延。容留一人居住者。降二級調用。二人者。降四級調用。三人以上者。革職。其道官。所屬地方。容留一人者。降一級調用。二人以上者。按數遞降。五人以上者。革職。督撫。所管地方。容留一二人者。罰俸六箇月。三四人者。罰俸一年。五人以上者。降一級留任。十人以上者。降二級留任。同城知府。照州縣例。議處。不同城知府。照道官例。議處。其該管地方官員。不將廢官起程日期報部者。罰俸一年。○二十八年。覆准。凡經大計題叅。與一應不時題叅

等官。各該督撫已拜疏時。應卽離任。遴官署理。至任內錢糧事件。并令查明。以部文到日。應歸旗者。卽照限勒令歸旗。應回籍者。卽令回籍。○二十九年。奏准。嗣後應歸旗人員。該管州縣官。武職專汛官。同城知府。不速催起程。容留一人者。降一級留任。二人者。降一級調用。三人者。降二級調用。四人者。降三級調用。五人者。降四級調用。六人以上者。革職。道官。不同城知府。兼轄武官。所屬地方。容留一二人者。罰俸一年。三四人者。降一級留任。五人以上者。降二級調用。十

大清會典 卷十八
人。以上者。降四級調用。總督。巡撫。提督。總兵官。所屬地方。容留一二人者。罰俸三箇月。三四人者。罰俸六箇月。五人以上者。罰俸一年。十人以上者。降一級留任。凡此等應歸旗官員。勒令五箇月內歸旗。如不速行起程。逾限一月以上。或中途逗留。或寄居他處。或本身進京。而留家口在外者。俱照定例革職。交與刑部治罪。已經革職者。交與刑部從重治罪。若於原任地方起程。逾限不及一月。或實係患病。及有不得已情由。不能起程。或已起程。而中途患病。情實者。令取

具地方官印結報部。俱行免議。如無故妄借事端。謊取印結。而地方官不行申報。給與印結。後被督撫。提鎮。查叅。或被旁人出首。該旗員照例處分。出印結官。照處分容留地方官例。議處。○又議准。嗣後內外文武革職。解任。休致。等官。俱照旗員歸旗例。勒限五箇月起程回籍。如在居官地方。或別處居住。或中途逗留逾限者。俱照旗員逾限例。處分。其容留地方文武各官。亦照容留旗員例。議處。其京官革職。休致。解任。該部知照各原籍督撫。仍移咨都察院。轉交五城官

員嚴催起程。將起程日期報部。外官行令該省督撫。一面將起程日期報部。一面知會原籍督撫。令以回籍之日報部。○三十年。議准。除革職提問官員。照例勒限驅逐回籍外。其餘解任。休致。丁憂等官。免其驅逐。聽其自便。○又覆准。除休致病故。并革職旗員。照舊例沿途取結催送外。其丁憂降調。裁缺候補等員。免其沿途取結催送。止給定限咨文。速行歸旗。仍將起程日期報部。如不速回。遲延違限。將該員并容留地方官。仍照定例處分。○三十六年。題准。革職提問。

應回籍各官。其原任地方與原籍接省者。限兩箇月。隔一省者。限三箇月。隔二省者。限四箇月。隔三省者。限五箇月。速行回籍。令該督撫於報明起程日期文內。將所隔省分。一并註明。咨部查核。倘有起程逾限不及一月。或實係患病。及有不得已阻滯情由。或已經起程。而中途患病難行者。許於限內。取具該地方官印結。申報督撫。該督撫查明咨部。以憑免議。若無故違限者。照旗員例處分。其中途容留之地方官。亦照例議處。○五十六年。覆准。黔省廢官。其本人病故。

子孫無力回籍。居住外省年久者。聽其自便。○又覆准。嗣後應歸旗人員。定限五箇月內。該管各官親看起程。分別程途遠近定限。大路有驛站者。每日令行一站。僻路無驛站者。每日行五十里。自伊本任地方。照站數里數。按日計算。扣定到京期限。即將起程到京日期。咨明該部。該旗。以憑稽查。如有無故遲延。或中途逗留。或在他處寄居。或本身進京。而令家口在外停頓者。卽令該地方官詳報。督撫查明題參。照例革職。交送刑部治罪。已革職者。交與刑部從重治罪。

該地方官容留不報。督撫不參。經該部。該旗。查出。或被科道糾參。該地方官。并督撫。俱照定例議處。若該員已經起程。該管官不將日期申報。或已報而督撫不行咨明。以致逗留生事者。一經發覺。亦照容留例議處。○雍正四年。議准。革職漢官離任者。外官交代完日。照舊限卽令起程。京官限一箇月內起程。該督撫。五城司坊官。卽將起程日期報部。并知會原籍地方官。仍照旗員歸旗例。依各省遠近程途定限。自伊本任地。照站數里數。按日計算。扣定日期回籍。到籍

大清會典 卷一
之日。該督撫卽將到籍日期報部查核。倘違限不卽起程。及逗留中途。并回籍遲延。違限一月以上者。都察院並該督撫題叅。照議處旗員例。交與刑部。分別治罪。如該管文武各官。或不於限內催令起程。或他省官員。聽革職人員遨遊境內。或潛住京城。五城司坊官。專汛武官。不查出驅逐。均照容留旗員例。容留一人居住者。降二級調用。二人者。降四級調用。三人以上者。革職。道官及兼轄武官。在伊等所轄地方。容留一人居住者。降一級調用。二人者。降二級調用。三

人者。降三級調用。四人者。降四級調用。五人以上者。革職。督撫提鎮。所管地方。容留一二人居住者。罰俸六箇月。三四人者。罰俸一年。五人以上者。降一級留任。十人以上者。降二級留任。同城知府。照州縣例議處。不同城知府。照道官例議處。司坊官。巡捕營專汛武官。照地方文武官同城知府例議處。巡捕營兼轄官。亦照兼轄官例議處。巡城御史。九門提督。照督撫提鎮例議處。其革職解任廢官。或有冤抑。赴都察院具呈申理者。具呈本地方官轉詳督撫。給咨來京。事

大清會典 卷十八
竣之日。都察院轉行五城司坊官。發回原籍。仍知會原籍地方官。如敢借端留滯。亦照例議處。五城司坊官。徇情容留者。亦照例議處。○又議准。回旗人員。除原無水路地方。及力能從陸回京者。聽其從陸。其有水路之處。及願從水路者。應聽從水路。當卽呈內開明。照原定限期計算。到京。倘無故逗留。至違定限。照例議處治罪。其起程時。地方官不親看報明督撫。及督撫不行咨報該部。該旗。并沿途地方官不捱程催逐者。俱照容留旗員例議處。

凡行取官員違限。康熙十五年。議准。行取官員。以部咨到日。限兩箇月內。該督撫卽委官交代清楚離任。如有未完錢糧盜案事件。該督撫卽於限內題叅。照案議處。不准考選。其餘各項事件。不行交代明白。卽行離任者。降二級調用。至到部限期。照地方遠近定限。違限三箇月以上者。不准考選。違限五箇月以上者。照赴任違限例處分。該督撫司道官。照陞員督催不力例處分。

凡行查職名。康熙九年。議准。官員奉上司行查

職名遲延者。罰俸一年。轉催官員。罰俸六箇月。
凡奉差不復任。康熙十五年。議准。官員奉差事
竣。復任遲延者。照赴任違限例。處分。

凡推諉事件。康熙九年。議准。官員將遲延事件。
推諉他人者。除照遲延例。計日處分外。再罰俸
一年。○十八年。議准。大小官員。在衙門不待事
畢。推諉滿官。早歸遲進。宴會嬉遊者。或料理公
務。瞻徇遲延。不行卽結者。司屬聽堂官題叅。堂
官聽科道題叅。俱革職。

凡官員將應結之事。駁查者。康熙十八年。議准。
司官。罰俸六箇月。堂官。罰俸三箇月。○雍正元
年。

諭。嗣後部內應駁事件。督撫仍行固執原題具奏。部
內卽將督撫一并議處。如不應駁事件。而部內故
求疵隙。題駁者。該督撫將不應駁情由奏聞。○又
題准。承審命盜及

欽部事件。以人犯到案之日起限。盜案。限一年。命案。
限六箇月。

欽部事件。限四箇月。如逾限不結。該督撫將易結不
結情由。詳查註明題叅。照例議處。至承審官內。

大清會典 卷一百一十八
有陞降調革。及因公他往。委員接審者。准其於本限內。展限一箇月。卽於原限內完結。不許又另作初限。如有借端巧爲生法掩飾。不行速結者。令各該督撫題叅。嚴加議處。各該上司。徇庇不行題叅。及下屬已經解審。混行駁查。以致承審官違限。並知屬官例限將滿。借端故爲派委。希圖展限者。一并從重議處。各該督撫叅遲延時。并將何月日解審。駁查次數。聲明。以便部內查核。

凡督撫合詞具題。康熙九年。題准。督撫將會議事件。並未會同議定。畫題。遽稱合詞題覆者。罰俸六箇月。○十五年。議准。總督合詞具題之事。未經詳查。卽行列名之巡撫。亦罰俸六箇月。○二十三年。議准。督撫會題之事。如有不合。分別議處。承行具題官革職者。列名具題官降四級調用。承行官降級調用者。列名官降一級留任。承行官降級留任者。列名官罰俸一年。承行官罰俸一年者。列名官罰俸六箇月。承行官罰俸六箇月者。列名官罰俸三箇月。承行官罰俸三箇月者。列名官免議。○雍正三年。議准。凡地方

大事。及大計。軍政。等應會稿者。督撫公同商訂。其餘平常本章。及薦劾人員。俱令各自陳請。叅劾官員。由司道。府。揭者。疏內載入。如司道。府。徇私曲庇。疏內一并題叅。司道。府。或到任未久。或遠委公出。則督撫獨叅。不必定列司道。等官銜。仍將司道。等不行列銜緣由。於本內聲明具奏。凡含糊具題。康熙九年。題准。督撫將奉

旨駁察事件。含糊題覆者。降一級留任。○雍正三年。議准。凡督撫糾叅屬員。必將應叅之事。備細臚列。或無款可列。必將所叅情由。剖晰是非。據實

指出具奏。如有不據實情。含糊具題者。該督撫并所叅之員。一并交部。照例分別議處。

凡擅行裁汰。康熙六年。題准。督撫將所屬冗員。未經題請。即行裁汰者。罰俸一年。

凡濫行調補。康熙三十九年。議准。雲南元江。開化。廣南。廣西。四府所屬官員。如該督撫濫將劣員調補。照以劣員保舉賢能例。議處。

凡本旗都統等官。勒索外任旗員。雍正元年。諭。旗員為外吏者。每受該旗都統。叅領。等官所制。自司道以至州縣。於將選之時。必勒索重賄。方肯出

結咨部。及得缺後。卽遣人往其任所。或稱平日受恩。責令酬報。或稱家有昏喪等事。緩急求助。或以舊日私事要挾。或五旗本王府不體下情。分外勒索。或縱本府大員肆意貪求。種種應酬。不可枚舉。以致該員竭蹶饋送。不能潔已自好。凡虧空公帑。敗壞身名者。多由於此。嗣後如有仍蹈前轍。恣意需索等弊。許本官據實封章。密詳督撫轉奏。督撫卽據詳密奏。倘督撫瞻顧容隱。卽許本官封章揭都察院轉爲密奏。倘不爲奏聞。卽各御史亦得據揭密奏。務期通達下情。以除積弊。外任旗員。勿得隱忍畏懼。朕不治以犯上舉首之罪。

凡笞辱屬官。康熙九年。議准。上司將所屬佐貳等官。如有事故。不行題叅。任意笞辱者。罰俸一年。如笞辱知縣以上官員者。降二級調用。

凡陞調官員罰俸。雍正三年。議准。凡奉

特旨陞調官員。原任內承督未完事件。應照離任官員例。罰俸一年者。除降級革職等案。俱照例罰俸一年外。如遇有應罰俸三箇月。六箇月。九箇月者。照依原任內處分議結。至督撫保題陞轉之員。仍照舊例處分。

凡官員不行迴避本省。或明知迴避。不行申說赴任者。降一級調用。

凡留用貪官。康熙十一年。議准。官員將永不叙用之人。私委官職者。革職。

凡濫行出結。康熙三十九年。題准。地方官代頂冒人員出結者。革職。

凡捕蝗。康熙四十八年。覆准。州縣衛所官員。遇蝗蝻生發。不親身力行撲滅。降三級留任。不行撲捕。又不申報上司者。革職。該管道府。不速催撲捕者。降二級留任。布政司。不行查訪催捕者。

降一級留任。督撫不行查訪飭催者。罰俸一年。該管地方蝗蝻生發。道府。不詳報上司。降二級調用。布政司。不詳報上司。降一級調用。布政司詳報。督撫不行題叅。被科道官糾叅。將督撫降一級調用。○又題准。地方有蝗蝻生發。協捕官不實力協捕。以致養成羽翼。爲害禾稼者。將所委協捕各官。罰俸一年。該州縣地方。或生有蝗蝻。不實力巡查撲滅。藉口隣境飛來。希圖卸罪者。該撫查明題叅。從重治罪。

凡餽送囑託。康熙九年。議准。官員因事夤緣。私

行餽送發覺之日與者受者俱革職提問如餽送之時不卽行出首後經發覺雖所餽之禮未受亦罰俸一年○十五年議准官員將上司衙役索詐情弊徇隱不報者革職○十七年覆准府州縣各官若無公事私謁上司並赴省慶壽夤緣通賄餽送銀兩等物行賀者俱照前例處分○又議准督撫差內使人役以訪事爲名遍歷州縣及上司自開便門令所屬官役人等出入傳事者亦俱革職○十八年議准督撫司道官員赴任時謁見在京大臣各官或自任所遣

人餽問者俱革職其大臣各官不行首告者一體處分至督撫司道官員家人子弟提塘人役等往來大臣各官家其主知者革職將家人寬免其主不知者降二級將兩家家人俱行正法提塘有職者革職無職者照家人例治罪其在京大臣各官往拜督撫司道等官餽送裘馬等物幕賓僕從人等應酬餞送等項者俱革職其督撫司道等官不行首告者亦一體處分至親往來免議其在外各官濫徵苛派餽送大臣官員不分與者受者俱革職提問○十九年議准州縣官

借送出差官員下程。科斂百姓者。照貪官例治罪。其督撫司道府廳等官。俱照失察貪官例治罪。○三十六年。覆准。凡官員並非公事。無故赴省。到任叅謁。新正賀年。生日慶壽。有犯干謁之禁者。嚴加治罪。○三十七年。覆准。上司官員。借訪事爲名。令家人衙役迭出。勒取州縣饋遺進奉者。許州縣官員揭報。督撫指名題叅。如督撫徇庇不行題叅。令科道官員訪實。指名題叅。該員亦許開其實跡。實封竟達通政司衙門奏聞。將該督撫從重治罪。○四十年。覆准。凡直省有不

肖官員。或私派私斂。并督撫司道。有非公事擅調屬員。府州縣官員。無故赴省。私自叅謁。餽送生辰節禮等弊。發覺之日。照例嚴加議處。○雍正三年。覆准。嗣後內外官員人等。如有投拜師生者。將投拜及受投拜之員。一并嚴加治罪。至鄉會科場。取中舉人進士。陞受外職者。嗣後如有親行探望。差人索取等弊。或經本官舉出。或被科道題叅。從重治罪。○四年。諭。官員因事囑託。事發者。革職。

凡書辦私宅往來。康熙二十八年。議准。嗣後司

官容書辦私宅往來者。或經堂官察出。或被科道糾叅。將官吏一併治罪。

凡招搖挾制。康熙九年。議准。官員任所。如有親戚朋友。聽其招搖詐騙者。本官革職。○十七年。議准。官員將遊客星卜。及優伶人等。轉送府州縣。并貽書薦引者。俱照前例處分。○十八年。議准。科道各官條奏。如隱附私情。希圖作弊。互相囑托。肆行妄為。外播威勢。挾制恐嚇。督撫等官者。發覺之日。俱革職提問。至大臣科道各官子弟。挾制地方官員。經督撫題叅。有據者。照律處

分。在京父兄不行約束。俱革職。若果挾制有據。而督撫不行題叅者。亦革職。○二十五年。覆准。科道官有希圖利已。允受囑託。妄行引奏。及交結朋黨。作奸誣陷者。事發。革職。送刑部治罪。其告假。丁憂。終養。之科道官。有包攬錢糧。干預詞訟。侵害小民。及徧遊各省。晉謁督撫。挾詐有據者。令該地方官。申報督撫題叅。本官革職。交刑部治罪。如該地方官。及督撫。隱匿徇庇。不行揭報。題叅者。一并從重議處。

凡宴會遊戲。康熙二十一年。議准。在外官員。居

大清會典 卷十八
住各城。如偷安宴遊。以致事務叢積。至夜辦理者。革職。○雍正二年。

諭。外官畜養優伶。殊非好事。朕深知其弊。非倚杖勢力。擾害平民。則送與屬員鄉紳。多方討賞。甚至借此交往。夤緣生事。二三十人。一年所費。不止數千金。府道以上。有司官員。事務繁多。日日皆當辦理。何暇及此。家有優伶。卽非好官。直省府道以上。至督撫提鎮。若家有優伶者。着該督撫訪查。指名密摺奏聞。雖養一二人。亦斷不可徇隱。亦必卽行奏聞。其有先曾畜養。聞此諭旨。不敢存留。卽行驅逐。

者。免其具奏。旣奉旨之後。督撫不細心訪察。所屬府道以上官員。以及提鎮家中。尚有私自畜養者。或因事發覺。或被揭叅。定將本省督撫。照徇隱不察之例。從重議處。

凡上司向屬吏借貸者。康熙十九年。議准。照貪官例治罪。

凡攜帶家口。康熙四十一年。覆准。外任官員。除妻子兄弟外。漢督撫。止許帶家人五十人。藩臬。止許帶家人四十人。道府。止許帶家人三十人。同知通判州縣。止許帶家人二十人。州同縣丞。

以下官員。止許帶家人十人。其所帶婦女。亦不得過此數。漢督撫。有管兵之責。如有多帶者。令其自行題請。旗員。有邊疆差遣之事。非民官可比。督撫。所帶家口。不許過五百。司道。府以下等官。所帶家口。照漢官加一倍。如有違定數之外者。降一級調用。

凡擅給牌文。康熙六年。題准。職官違例擅寫牌文。給與族人者。革職。

凡京官掣籤不到。康熙五十九年。議准。嗣後京官赴補。務於前月初一日親身投供驗到。方准

掣籤。如未經投供驗到者。不准銓補。其已經驗到。臨期無故掣籤不到者。照外官例處分。

凡察對冊籍。定例。官員紀錄。未行詳查。遺漏抵銷者。司官罰俸兩箇月。未經查出之堂官。各罰俸一箇月。康熙十八年。

諭。察對冊籍。係司官職掌。以後此等事情。堂官不必議處。

凡規避軍興。康熙五十九年。

諭。西邊正值軍務之時。地方不肖官員。規避以圖脫離彼處。從輕議處回籍。又復捐納。希得美缺。不可不懲。

以後俱着革職。亦不許其捐復。○六十年。議准。陝西用兵之際。地方官員。道員以下。知縣以上。有以年老患病告退者。該督撫驗明。實係老病不能辦事行走者。該督撫保題到日。准其離任回籍。如任內有經手錢糧未完。俟錢糧清完之日。再令回籍。回籍之後。不許再行捐復起用。如有因事繁難。規避告退者。該督撫題叅到日。照例革職。俟陝西用兵完日。仍照舊例遵行。

凡佐貳官擅准詞狀。康熙十五年。議准。佐貳官員。奉正印官批行事件。方許審理。若擅准詞狀者。降一級調用。如正印官不行查報。事發。正印官罰俸一年。○四十五年。議准。五城副指揮。吏目。係佐貳官。非奉御史批發。正印官移行。擅行准理民詞。該城御史糾叅。照例嚴加議處。詳見都察院。

凡案件假手書吏。雍正四年。覆准。司道。知府。批詳看轉。皆由書吏定稿。以致高下其手。應通行督撫。嚴飭司道。府衙門。一切案件。斷不可假手書吏。如仍蹈故習。吏則有贓者。照枉法受財律計贓科罪。無贓者。依不應重律。杖八十。革役。官


大清會典 卷一百一十八
照溺職例。革職。如督撫不行題叅。照不叅劣員例。降三級調用。

凡審處錯誤。康熙十四年。議准。官員將良民斷為逃人者。罰俸一年。奴僕錯斷為主。并另戶之主。斷作奴僕者。或將應革職降級之人。不議降革者。俱罰俸一年。若將應承受家產之人。不與承受。不應承受家產之人。誤准承受者。或將不應革職降級之人。錯議降革者。俱罰俸半年。若將未經革職之員。卽擬杖罪折贖等事。並未敘其有功。與抵銷紀錄者。俱罰俸兩箇月。○雍正

五年。議准。嗣後承審命案盜案各官。如有悞定重罪。草菅人命。被接任官審出實情者。將審出實情官加一級。永為定例。

大清會典卷之十八

三



大清會典卷之十八

文政三



